

ZOMA MASINA - TAONA - B



Nianatra ny Faneke na Izy, ka tonga fototry ny famonjena ho an'izay manaiky Azy.

Ry Kristianina havana, mbola ao anatin'ny hateloana masina isika. Omaly isika no nankalaza sy nandinika ary niaraka niditra tamin'i Jesoa amin'izao hateloana masina izao tamin'ny fankalazana ny

Alakamisy masina izay nanorenan'i Jesoa ny famonjena antsika. Tanteraka izany famonjena izany raha nanolotra ny aina tamin'ny alalan'ny vatana sy ràny izy tamin'ny Eokaristia sy nanasa ny tongotry ny mpianany anambarany fa io no lèlam-pamonjena dia ny fanompoana ary nilaza izy ataovy izao ho fahatsiarovana ahy. Izany indrindra no

Vakiteny I : Iz. 52, 13 - 53, 12
Tononkira : Salamo 115
Vakiteny II : Heb. 4, 14-16 ; 5, 7-9
Evanjely : Jo. 18, 1-40; 19, 1-42

tanteraka amin'izao zoma masina izao ka mangina ny tany fa mahatsiaro ny fijaliana sy nahafatesan'ny Tompo izay foto-kevitra lehibe ankalazaintsika androany rahateo. Toa resy isika satria maty tokoa ny tomponsika nefà ny ankalazaintsika dia tsy ny fahafatesana mankany amin'ny faharesena sy fahaverezana fa fahafatesana manambara fandresena ny ratsy, fandresena ny fahotana.

Anatin'ny fahanginana isika mitsakotsako izany rehetra izany kanefa ao anatin'ny fahanginana manambara fandresena satria i Kristy maty dia mahatoky isika fa raha miara-maty aminy amin'ny fahotana dia miara-mitsangana aminy ka ny fahafatesana no levona ao amin'ny fasana fa aim-baovao no mivoaka ao amin'ny fasana. Izany no andrandraintsika. Fahanginana feno fanantenana, fitiavana no ankalazaintsika amin'izao andro zoma masina izao ary mizara efatra ny fankalazana izany mba hiainantsika ny ankalazaintsika.

Ny fandinihantsika an'i Jesoa nijaly sy maty amin'ny alalan'ireo vakiteny naroso amintsika fa indrindra ny evanjely izay manohy ny efa voalaza ao amin'ny vakiteny voalohany izay manomana antsika bebe kokoa amin'ny andro anio.

Ny fizarana faharoa dia fivavahana amin'ny alalan'i Jesoa mba ho famonjena ny olona rehetra maneran-tany. Ranombavaka manetriketrika no filazantsika azy, ranombavaka anolorana an'izao tontolo izao amin'Andriamanitra mba ho izao tontolo izao vaovao tokoa no ateraky ny fankalzana ny Paka. Ny vokatry ny fijalian'i Jesoa dia ilay fiainam-baovao entin'ny Paka izany hoe ny fifandraisana amin'Andriamanitra mirindra araka ilay fihavanana nentin'i Jesoa izay tanteraka tamin'ny alalan'ny hazo fijaliana. Ny fifandraisantsika samy olombelona ho fianakaviana iray ao amin'Andriamanitra izay fihavanana sy fitiavana tena izy fa tsy sentosento. Ny fifandraisana vaovao amin'ny zava-boaahary, hiezaka isika mba hifanaraka amin'ny fiainana maha zanak'Andriamanitra no hanajantsika ny zava-boaahary fa tsy hanjakazaka ka handrava ny zava-boaahary isika.

Ny fizarana fahatelo dia isika mitsaoka sy manaja ny hazo fijaliana masina, mitsaoaka an'i Kristy tamin'ny hazo fijaliana hanambarantsika fa io no fototry ny famonjena antsika.

Ny fahefatra dia ny sakramentan'ny eokaristia, isika mandray ny vatana sy ràn'i Kristy mpamonyjy antsika. Tsy misy lamesa androany fa mandray ny komonio ho fiombonantsika aminy.

Ny vakiteny voalohany bokin'Izaia mpaminany dia efa manambara amintsika izay hanjo an'i Jesoa ilay mpanompon'Andriamanitra *"Toy ny nigagan'ny maro nahita Azy, - fa rava Endrika loatra Izy, ka ny Tarehiny efa hoatra ny tsy tarehin'olombelona intsony; ary ny Tavany efa hoatra ny tsy tavan-janak'olombelona intsony, - no hampiontanany firenena maro."*

Izany tokoa no nanjo an'i Jesoa sy nitondrany ny fitiavan'Andriamanitra amintsika ary tsy takapolopoloriona izany halehiben'ny fitiavany antsika izany . Milaza koa i Md Paoly amin'ny taratasiny ho an'ny Romana 5 : *"Fa izao kosa no nanehoan'Andriamanitra ny fitiavany antsika: fony mbola mpanota isika no maty hamonyjy antsika ny Kristy; koa mainka fa izao efa nohamarinina tamin'ny rany izao, dia tsy maintsy afany amin'ny fahatezerana mihitsy"*

Ny ankalazaintsika amin'izao Zoma masina izao dia ny fitiavan'Andriamanitra antsika olombelona izay abaribarian'io fijalian'i Jesoa sy ny famantsiana azy tamin'ny hazo fijaliana io. Mampiseho ny fitiavany antsika Andriamanitra tamin'ny nanirahany zanany lahitokana ho amin'izao tontolo izao mba hahavelona antsika amin'ny alalany. Tsy isika no tia an'Andriamanitra rahateo fa izy no tantsika. Tanteraka izany amin'izao fibanjinantsika ny hazo fijaliana izao.

Mifikira àry isika ry Kristianina havana amin'ny hazo fijaliana, ampandrosoy ao antranontsika ny hazo fijaliana fa handray ny famonjen'i Kristy isika sy ireo izay mandalo ao an-tranontsika koa.

Maro ny olona voalaza amin'ny tantaran'ny famonjena antsika amin'ny evanjely izay novakina tamintsika amin'izao fankalazana ny zoma masina izao. Anjarantsika no mandinika aiza amin'izy ireo no mba misy antsika ? Raha atambatra indray miaraka ireo olona rehetra voatantara ireo dia azo lazaina fa ny toetrantsika olombelona dia hita ao anatin'ireo olona marobe nanodidina ~~tamin'~~ny Fijalian'i Jesoa Kristy Tompontsika nosoratan'i Md. Joany.

Raha mandinika an'i Pilaty isika dia tsapantsika ny anjara toeran'ireo manam-pahefana. Isika amin'ny toerana misy antsika tsirairay dia manana fahefana ary matetika tsy mahay mandalanjalanja ny fahefana izay satria mihevitra araky ny toetran'olombelona.

Raha mandinika an'i Jodasy isika dia mahita fa matetika isika no mamadika an'i Jesoa amin'ny fiaianantsika raha manao izany amin'ireo kely sy madinika indrindra ka mitady ny tombotsoa ho antsika sy ny voninahitra ho antsika.

Raha mijery an'i Piera isika dia mahita fa matetika isika no mandà an'Andriamanitra sy mandà an'i Jesoa amin'ny fianantsika satria tsy mifikitra amin'ny tena fitiavana fa mitady hanavo-tena, tsy misy fahasahiana, matahotra.

Raha mandinika ireo olona nilaza hoe "fantsihos amin'ny hazo fijaliana" dia midika fa mifidy an'i Barabasy sy izao tontolo izao. Impiry isika no manontany sy mitady aiza ny marina ?

Aleontsika mitsara sy mitsikera toy izay mikatroka amin'ny asa aman-draharaha Kristianina, impiry isika no manohittra ny rafitra misy, impiry isika no maneso ny namantsika tahaka an'ireo naneso an'i Jesoa.

Soa ihany fa noho ny fahasoavan'Andriamanitra dia misy koa fotoana miseho tahaka ireo vehivay masina sy i Joany isika ka tsy misaraka amin'i Jesoa na inon-kidona na inon-kiatra ary rehefa tsy misaraka fa mitoetra ao aminy isika dia mankahery antsika izy. Natolony antsika ny reniny raha nilaza tamin'ilay mpianatra malalany izy hoe "indro ny reninao", ary natolony an-dreniny isika raha nilaza izy tamin'i Masina Maria "indro ny zanakao". Teraka ny Eglizy satria manana reny isika ary miara-dàlana amintsika izy.

Ary raha nilaza i Jesoa hoe tanteraka ny zava-drehetra, azo lazaina fa evanjelin'ny fandresena ho antsika izany. Ny fandresena ao amin'i Jesoa tsy ho entina mirehareha fa ho entina hanompo hanavao an'izao tontolo izao ary izany no antenantsika raha hankalaza ny asabotsy masina isika rahampitso. Eo amin'ny tantaran'ny fijalian'i Jesoa Kristy io ny famonjena antsika olombelona koa enga anie ny fiaianantsika navaoziny tamin'izy teo amin'ny hazo fijaliana mba hihavao tokoa amin'ny fankalazana ny asabotsy masina anatin'ny hateloana masina mandeha amin'ny Paka izao. Paka fandalovana miala amin'ny fianana tsizarizary ka miditra amin'ny fiaianam-baovao satria izany no antony nijalian'i Jesoa teo amin'ny hazo fijaliana. Raha mifikitra sy mitoetra aminy isika sy itoerany dia mamokatra ny fiaianantsika ary izany no Paka ho antsika.

Ry Jesoa Kristy tombo ô, nanolo-tena ianao teo amin'ny hazo fijaliana sy natolonao anay i Masina Maria reninao koa enga anie izahay noho ny vavaka ataony mba ho olom-baovao ao aminao ary hifikitra amin'ny hazo fijaliana fa io no lèlam-pamonjena ho anay izany hoe mifantsika miaraka aminao amin'ny fahotana izahay sy amin'ny ratsy rehetra ataonay ka alevinao ao amin'ny fahafatesanao, alevinao ao am-pasana ny ratsy fa fiaianam-baovao no iombonanay aminao amin'ny alalan'izao fankalzana ny "tridium pascal" izao ka handray ny fahasoavana avy aminao anie izahay. Enga anie ny fiaiananay mba ho fianana misy anao manontolo amin'izay ho famantaram-pamonjena ho an'ny hafa koa izahay. Amen

Mompera Arseveka Mgr Benjamin Ramaroson